

Gerbert Kunst nombra como Representante nobo di Hulanda na Aruba, Corsou y Sint Maarten

Recientemente, mediante un comunicado di prensa, a bira conoci cu Consejo di Minister di Hulanda a aproba e nombracion di Sr. Gerbert Kunst como e Representante nobo di Hulanda na Aruba, Corsou y Sint Maarten.

Segun informacion, e nombramento di Sr. Kunst a tuma lugar riba recomendacion di Secretario di Estado pa Digitalisacion y Relacionnan den Reino, Zsolt Szabó. E nombramento aki lo drenta na vigor dia 15 di mei 2025.

Pa lora ta trayectoria di Sr. Kunst, actualmente e ta fungi como Director di Politica Internacional na e ministerio di Enseñansa, Cultura y Ciencia (OCW). Anteriormente e tabata Consul General di Reino Hulandes na San Francisco y Director di Asuntonan Europeo y Internacional na

ministerio di Asuntonan Economico. Sr. Kunst a studia ley na Leiden y tambe tin un Master of Business Administration (MBA) y un Master of Public Administration (MPA).

Representacion di Hulanda na Aruba, Corsou y Sint Maarten (VNACS) tin oficina na Willemstad, Oranjestad y Philipsburg y ta representa Hulanda den e tres paisnan. E Representante ta encabesa esaki y ta hunga un rol crucial den mantencion di bon relacion cu e tres paisnan autonomo. VNACS ta contribui na desaroyo di politica Hulandes pa e paisnan y na su implementacion.

Ademas VNACS ta brinda guia y ayudo na Hulandesnan den necesidad y ta coordina e maneho di ayudo di Hulanda den crisisnan grandi. E representacion ta ehecuta su tar-

eanan den bon cooperacion cu tur cuater pais den Reino.

Te ora cu e representante nobo sinta, Sr. drs Saskia de Reuver, den su funcion como Director di Relacionnan den Reino/Paisnan na ministerio di Interior y Relacionnan den Reino, lo asumi e funcion di Representante na Aruba, Corsou y Sint Maarten.

Secretario di Estado Szabó a indica cu e ta contento cu e nombramento di Sr. Kunst. “Gerbert Kunst ta trece un rikesa na experiencia internacional y for di Den Haag cune. E ta un profesional motiva y mi ta spera cu hunto cu su coleganan e lo bira e intermediario importante cu por duna un contribucion riba tanto tereno economico-financiero, como e tereno di mantencion di ley, pa amplia y profundisa e relacion. Mi ta contento cu nos a haya un



candidato pa e puesto aki, cu en bista di su conocimiento y experiencia cu e partinan Caribense di Reino, tin bi-

sta pa lora tin mester pa un bon cooperacion entre Hulanda y Corsou, Aruba y Sint Maarten,” el a bisa.

OM a apela sentencia cu hues a dicta den caso Flamingo



Dia 22 di januari ultimo Corte di Prome Instancia di Aruba a dicta sentencia den caso Flamingo y a declara actual parlamentario, lider di fraccion PPA Otmar Oduber culpabel di fraude, intento di fraude y abuso di su funcion. Ministerio Publico (OM) a anuncia cu nan a apela e sentencia aki.

Segun e noticiero local Noticia Cla, OM a anuncia cu a apela e sentencia contra Oduber den caso Flamingo y

a apela e sentencia di E. Esser, ken a ser declara liber di e cargonan den su contra.

Ministerio Publico a indica cu no ta di acuerdo cu e parti di vrijspraak cu e hues a dicta ni tampoco cu e sentencianan cu Oduber a haya.

Tabatin un total di cinco acusacion, cu tabata trata diferente caso, entre otro fraude, estafa y tambe maluso di su poder como minister e tempo ey. Hues a indica cu e ta haya cu a ser legalmente y

convincientemente proba cu Oduber a haci su mes culpabel di estafa. Hues a indica tambe cu e ta haya cu por declara prueba e parti di fraude den caso di entrega di tereno Malmok y e caso di spookambtenaarnan.

Hues a duna Oduber un castigo di 65 dia di prizon di cual 319 dia ta condicional, y un tempo di prueba di tres aña. Esey kiermen cu 46 dia, cual el a sinta caba, esey e ta hay'e como castigo incondicional di prizon. Esey ta nifica cu Oduber no mester bay prizon.

Ademas di e castigo di prizon hues a dicta cu Oduber ta haya castigo di trabou comunitario di 240 ora y si e no cumpli cu esaki e ta haya 120 dia cera.

Inicialmente hues a duna Oduber tambe un castigo adicional cu OM a pidi cu ta kita e derecho pa por traha den un funcion publico, como ambtenaar y tambe ta kita e derecho cu comunidad di Aruba por vota p'e den un cualkier eleccion pa un periodo di tres aña.

Despues di algun dia, hues a saca un notificacion di rectificacion den e sentencia di Oduber pa motibo di “un error obvio.”

Den e documento di e coreccion di sentencia hues ta indica cu a bira bisto cu a comete un error obvio den e sentencia y den e basenan pa e sentencia cu ta presta su mes pa coreccion pa medio di un sentencia correctivo.

E documento ta splica cu e sentencia ta muestra claramente cu e persona condena a keda absolti di e cargo di soborno pasivo manera cu tabata inicialmente acusa y cu e intento di fraude, fraude y abuso di funcion si a keda prueba.

Den e documento ta splica cu corte ta determina cu riba

pagina 50 di e sentencia dicta, e texto referi na dje den e basenan di e sentencia, “y di e derecho pasivo di voto”, mester ser elimina.

Ademas corte ta determina cu riba pagina 52 di e sentencia dicta, e castigo adicional menciona den e parti operativo: “ta priva e sospechoso di e derecho di wordo eligi como miembro di organonan general representativo pa un periodo di 3 (tres) aña” ta caduca.

Esaki ta nifica cu Oduber por keda den parlamento como lider di fraccion y por postula su mes durante eleccion.

